

Sus aën haout amaont à Albecq, lé laong d'la caoute du cotaï d'Cobo, i y a aën bâtiment en rouge granit au haout d'enne grând' rocque. Il est app'laï Lé Guet, aën naom qui viant du français pour djettaïr. Dé d'là nou peut veir la caoute franc dé Portinfeir jusqu'à L'Erée. Chu rotcher a servi comme enne piaèche pour faire lé guet dépis lé seizième siècle (1581) et probabllement dépis Lé Moyen Age. Ch'est justement la piaèche pour veir autcheun baté qui voudrait v'nir ravaudaïr lé laong d'la caoute. Lé Beguin du Câté -aën faeu qui guernissait la paraesse du dangier- pouvait ête allumaï là, et tous pouvaient lé veir. En 1780, durant la Guerre d'Indépendence en Amerique, les paraesses du vouest aeurent à l'vaïr £1,600 pour bâtir lé guet à Albecq et enn'aoute à Plleinmaont, mais i parâit qu'i y avait déjà enne sorte dé maisaon là car sus aën mappe du seizième siècle, i y avait mertchi "La Maisaon du Guet", et en 1757 i y a aën rapport dé réparatiaons qui furent faites à chu temps.

En 1782 l's Etats prinrent responsibilitaï pour Lé Guet et payirent pour tout chu qu'i fallait pour les soudards statiounnaïs là. Lé gouvernaeux Sir John Doyle, durant la guerre Napoléonique, appréciait qué chu guet baillait guernissement en bouan temps d'autcheun invâisiaon par enn'ennémi et durant l'Otchupatiaon les All'mands lé firent servi étout. I mirent enne batt'rie à cotaï du guet et y maontirent aën conaon.

Ches jours, chu qu'i mirent là sert comme enne piaèche éiouque nous peut s'asséïr pour admiraïr la belle vaeu et sé r'posair pour aën temps.